

四庫全書

史部

欽定四庫全書

史部

綱目分註拾遺卷二

詳校官檢討_臣 劉錫五

刑部郎中_臣 許兆椿覆勘

總校官庶吉士_臣 倉聖脉

校對官助教_臣 胡予襄

謄錄貢生_臣 李 櫟

欽定四庫全書

綱目分註拾遺卷二

漂陽芮長恤撰

田疇

劉虞備禮請以為掾具車騎將行疇曰今寇賊縱橫道路阻塞稱官奉使為衆所指願以私行期於得達而已虞從之疇乃自選家客二十騎俱上西關出塞傍北山直趣朔方循間道至長安致命詔拜為騎都尉疇以天

子方蒙塵未安不可以荷佩榮寵固辭不受得報馳還
疇奉使一事極費苦心極有作用既不廢君命又能
辭寵祿真可謂才節兼備之士分註所載甚簡今故
補之

孫策

策以母弟託張紘徑到壽春見袁術云云術謂策曰吾
用貴舅為丹陽太守賢從為都尉彼精兵之地可還依
召募

術用景賁非為策也亦託此以謝策耳分註刪貴舅
賢從兩句似策之往無所依而術亦無以藉口矣既
而策竟以曲阿發跡英雄用武之地必有所因非偶
然也

沮授說袁紹

世濟忠義下有今朝廷播越宗廟殘毀觀諸州郡雖外
託義兵而內實相圖未有憂存社稷卹民之意今州域
粗定云云

先言州郡無憂社稷者後勸紹迎天子於義為宜逆順兩分是非並見刪去上數句反欠抑揚

周瑜迎孫策

策至歷陽瑜將兵迎之上有時周瑜從父尚為丹陽太守句

因尚守丹陽故瑜得以其兵糧自丹陽來迎瑜非自有兵糧也上句似不可刪

呂範

自稱領都督下有策乃授傳委以軍事八字然後接由是軍中云云

鮮于輔

劉虞從事鮮于輔等合率州兵欲共報讐以燕國閭柔云云

輔等合兵報讐是其本指分註不載報讐句止似泛然起兵不見大義所在

陳紀父子

前尚書陳紀紀子羣皆在布軍中操皆禮而用之

前既不擇所從而託身於布繼又倉卒遭遇而受知於操後此遂為曹氏佐命而太丘之澤斬矣

修雒陽宮

董承繕修雒陽宮太僕趙岐為承說劉表使遣兵詣雒陽助修宮室軍資委輸前後不絕

此節分註不載以其為小善故邪然天子當困急之中而臣子猶知奉公之誼是亦劉表一節可取差勝

於無君者耳

太史慈

卿須幾兵多少隨意慈曰慈有不赦之罪將軍量同桓
文當盡死以報德今並息兵兵不宜多云云當復從誰
下有餞送昌門把腕別曰何時能還答曰不過六十日
既行議者猶言遣之非計策曰諸君勿復言孤斷之詳
矣

此一條分註頗有刪節今悉補之以備事會曲折可

見英雄待人坦懷大度推誠不疑如此昭烈武侯而
下臣主相遇如策之與慈亦三國時所僅見者

焚易京

穿其樓下燒之原本作穿其樓下施木柱之度足遠半
便燒之樓輒傾倒稍至京中

穿地道於樓下恐先傾陷故仍以木柱之地道達樓
之半便以火燒之蓋燒其支柱之木非徒燒地道也
中刪八字文雖省而意轉晦

衛覲與荀彧書

十萬餘家下有聞本土安寧皆企望思歸二句方接而歸者云云

韓嵩說劉表

擇所宜從下有豈可擁甲十萬坐觀成敗求援而不能助見賢而不肯歸此兩怨必集於將軍恐不得中立矣
曹操善用兵

嵩本意欲勸表附曹然不先說破表當時坐守之弊

即露此意便覺直致豈可擁甲以下似不宜刪

田豐說袁紹

乘虛迭出下有以擾河南句則擊其右下有使敵疲於
奔命民不得安業二句

曹操襲烏巢

人抱束薪下云所歷道間有問者語之曰袁公恐曹操
鈔畧後軍遣兵以益備聞者信以為然皆自若既至圍
屯大放火

所歷道間以下分註無之此固細節然自官渡平行至烏巢無他驚拒亦可見阿瞞用詐之一班

審配

配二子為曹操所禽或謂紹曰配二子在南必懷反計逢紀素與配不睦紹以問之紀曰配天性烈直每慕古人之節必不以二子之故為不義也紹曰善

袁氏謀士多矣自沮授而下惟田豐為庶幾餘皆小人也審配亦敗袁氏事者然不以二子而易其心不

以國亡而改其節猶若可以晚蓋者故憫而錄之

張魯

魯以劉璋闇懦不復承順襲別部司馬張修殺之而并其衆璋怒殺魯母及其弟魯遂據漢中與璋為敵

此張魯竊據之始

程畿

龐羲遣吏程祁宣旨於其父漢昌令畿索實兵不應命羲更使祁說之畿曰我受牧恩當為盡節女為羣吏自

宜効力不義之事有死不為義怒云云

漢昌令畿下原本有索賓兵三字分註刪此三字則
不得二字不知何謂既而義更使祁說其父畿畿曰
云云故龐羲繼之以怒分註刪更說一段亦非本然
節次

孫權平山越

孫權西伐黃祖破其舟軍惟城未克而山寇復動權還
過豫章使呂範平鄱陽程普討樂安太史慈領海昏以

別部司馬黃蓋韓當周泰呂蒙等守劇縣令長討山越
悉平之建安漢興南平民作亂權使南部都尉賀齊進
討皆平之復立縣邑料出兵萬人拜齊為平東校尉

此一條分註刪節過多殘脫淆訛不可讀今據通鑑
原本補之文足而事亦明矣

李孚

將三騎投暮詣鄴下自稱都督 至南園當章門 持
白幡從三門並出降孚復將三騎作降人服隨輩夜出

孚冒圍入鄴入而復出曹瞞亦無如之何通鑑載其事宛然如見分註所錄頗詳但猶有闕文今稍補之

孫韶

孫翊之難將軍孫河自京城馳赴宛陵亦為嫺覽等所殺河子韶年十七收河餘衆屯京城權引軍歸吳夜至京城下營試攻驚之兵皆棄城傳檄警備謹聲動地頗射外人權使曉喻乃止明日見韶拜承烈校尉統河部曲

此一條綱目所無愚竊謂徐氏之復夫仇孫韶之收父軍父子夫婦之間並關名教無他軒輊故補錄之以附於徐氏之後

田疇

尚有微逕可從今賊將以大軍當由無終不得進而退懈弛無備若回軍云云操曰善乃引軍還而署大木表於水側路傍曰方今夏暑道路不通且俟秋冬乃復進軍敵候騎見之信以為然操令疇將其衆為鄉導

疇之本謀在回軍出盧龍口云云操善之而引軍還
又偽署標表以紿之此其所以無備而斬蹋頓也中
一段不可刪

曹操殺太中大夫孔融

郗慮承操旨構成其罪令丞相軍謀祭酒路粹奏融
云云

據原本則構融之罪者慮也奏融者粹也分註刪去
路粹徑謂郗慮奏融非其實矣

魯肅

肅迎會備且問曰豫州今欲何至曰與蒼梧太守吳巨有舊欲往投之肅曰孫討虜云云巨是凡人偏在遠郡行將為人所併豈足託乎備用肅計進住樊口

此一節分註不載若為玄德諱者蓋求救之說玄德不肯先出諸口蒼梧之往非其本心姑為是權辭以對耳然吳巨之不足託肅又料之審矣孫劉共治曹操其機在子敬一行不可謂子敬之無裨於劉氏也

孫權長史張紘卒

綱目於是年徙治建業之下書張紘卒通鑑卒張紘則在帝禪建興七年遷都建業之下事詞同而歲月異自建安壬辰至建興己酉相距十七年此蓋通鑑誤而綱目正之也

徙濱江郡縣

戶十餘萬皆東渡江上有自廬江九江蘄春廣陵九字張遼守合肥

權大驚走下有望見遼所將兵少乃聚圍遼數重遼急擊圍開將麾下數十人得出餘衆號呼曰將軍棄我乎遼復前突圍拔出餘衆吳人奪氣乃還修守備衆心遂安 權守合肥十餘日城不可拔撤軍還云云

張遼之勇三國多有之非綱目之所貴故但錄其決機之速而畧其突圍之功然無遼之勇則亦未必能退吳兵也故曰志至焉氣次焉

以裴潛為代郡太守

操欲授以精兵潛曰單于自知放橫日久今多將兵往
必懼而拒境少將則不見憚宜以計謀圖之遂單車之
郡單于驚喜

分註但載單車之郡以下而盡刪授兵等語如此便
不見裴潛料敵方畧而冒昧受郡矣

楊顓

身親其役下有不復付任勞其體力為此碎務形疲神
困

馬謖

丞相南征叅軍馬謖送之數十里亮曰雖共謀之數年
今可更惠良規謖曰云云

觀武侯之惓惓於謖如此真可謂求善無厭矣言過
其實昭烈之言無乃可思惜乎其不蚤以實事試之
也

陳羣疏

原本云若不和睦則有讐言黨有讐言黨則毀譽無端毀譽

無端則是非失實此皆不可不深察

如分註所刪定則近於割裂而三句意亦不聯貫

陸遜

遜陳便宜勸吳王云云又云忠謹之言不能極陳王報
曰書載予違女弼而云不敢極陳何得為忠謹哉於是
令有司盡寫科條云云

因遜言不敢極陳故王報之以書且命寫科條齋令
損益非無故寫齋科條也刪中數句非是

賈逵救曹休

不及終日下有賊以軍無後繼故至此今疾進云云賊見吾兵必走若待後軍云云

敗司馬懿殺張郃

至於鹵城下有張郃曰祁山知大軍已在近人情自固可止屯於此分為奇兵示出其後不宜進前而不敢逼坐失民望也懿不從故尋亮既至又登山掘營不肯戰賈詡魏平云云郃進至木門與蜀戰蜀人乘高布伏弓

弩亂發郤中飛矢而死

慙等尋亮後至於鹵城猶是遙叙語張郤請止屯於此此字疑即指上邽尚未實至鹵城也既至又登山掘營不肯戰此乃實至鹵城耳分註徑以登山掘營接至於鹵城之下則原本既至二字竟無安頓處所公孫淵置吳使秦旦張羣杜德黃彊等於玄菟

旦與羣等議曰吾人遠辱國命自棄於此與死無異今觀此郡云云為人所告太守會士衆閉城門四人皆踰

城走時羣病疽瘡著膝德扶接與俱嶇崎山谷行六七
百里創益困不復能前卧草中相守悲泣羣曰吾不幸
死亡無日卿諸人宜速進道冀有所達空相守俱死窮
谷中何益德曰萬里流離死生共之不忍相委於是推
旦彊使前云云

此四人者一時有共事之情吉凶生死膠固而不可
解蓋其結念在君臣而推分又如朋友非徒共患難
之道當如此也瘡著膝以下分註刪去大半今為補

之

魏延作亂

作斷後將乎下有延與禕共作行留部分令禕手書與已連名告下諸將禕紹延曰當為君還解楊長史長史文吏稀更軍事必不違命也禕出犇馬而去延尋悔之已不及矣

此一段分註不載似無甚關係但禕往延所揣其意指尚未畢事刪去前語竟不識禕與延作如何散局

耳

王雄

幽州刺史王雄使勇士韓龍刺殺鮮卑軻比能自是種落離散互相侵伐彊者遠遁弱者請服邊陲遂安

高堂隆疏

凡帝王徙都立邑皆先定天地社稷之位敬恭以奉之將營宮室宗廟為先居室為後今園丘方澤南北郊明堂社稷神位未定宗廟之制又未如禮而崇飾居室云

云

此疏本以天地社稷宗廟為先兩意並起今園丘方
澤以下亦兩意分承分註刪去帝王徙都立邑三句
單存將營宮室云云總以郊廟未定一句結之似前
後不相照應

孟光

智意為先下有智意自然不可力强致也句

光之意欲儲君讀書當今開發智意但未曾暢說耳

分註刪此句其意益晦

周脩

而脩恃此淫酗自恣前後告喻曾無悛改孤於公瑾義猶二君樂脩成就豈有已哉迫脩罪惡未宜便還且欲苦之云云

吳主念公瑾以及脩觀其告諸葛等云云可謂恩義兼至矣分註刪去數語反不見成就中材作用

漢兵據興執

便為深禍下有今宜先遣劉護軍據興執平為後拒若
賊分向黃金平帥千人下自臨之比爾間涪軍亦至此
計之上也諸將皆疑惟護軍劉敏與平意同遂率所領
據興執

分註但言據興執而刪後拒分向等語則王平與劉
敏先後犄角之勢分合應變之機俱不可考矣

廢曹芳

懼不敢發下有昭領兵入城司馬師乃謀廢帝以皇太

后令云云 歸藩於齊下有使郭芝入白太后后方與
帝對坐芝謂帝曰大將軍欲廢陛下立彭城王據帝乃
起去太后曰我欲見大將軍芝曰何可見耶但當速取
璽綬師又遣使授帝齊王印綬出就西宮芳與太后垂
涕而別

司馬昭領兵入城司馬師云云此二句不宜刪彼以
兵威脅制上下故廢立不難觀郭芝入白太后即質
言於帝曰大將軍欲廢陛下立彭城王據太后欲見

大將軍芝則曰何可見耶但當速取璽綬劉身之註
云王莽篡漢遣王舜求璽於元后其辭氣何至如此
信哉

諸葛誕

以誕為司空下有召赴京師誕得詔書愈恐二句又有
疑揚州刺史樂綝間已句表裏再重塹壘甚峻下有
文欽等數出犯圍逆擊走之司馬昭又使石苞州泰
等簡銳卒為遊軍以備外寇泰擊破朱異於陽淵異走

擊文欽破朱異一在城下一在陽淵先後兩事分註
摠云擊欽異皆破走之殊不分曉

昭身自臨圍見城上持弓者不發曰可攻矣乃四面進
軍克之

魏師入寇

鍾會至漢中使前軍李輔統萬人圍王含於樂城護軍
荀愷圍蔣斌於漢城會徑過西趨陽安口

却住漢壽分守漢樂二城此姜維之謀也會分兵圍

二城而關口不守矣

無令敵得入平地瞻猶豫未納崇再三言之至於流涕
瞻不能用艾遂長驅而前擊破瞻前鋒瞻退住綿竹

黃崇之言明白易曉而諸葛瞻不能用空以身殉惜
哉維與瞻雖無意於誤國而誤國之罪亦不能逭矣
鍾會問王戎

幽州刺史王戎

戎未嘗為幽州刺史為幽州者乃戎之祖王雄也雄

刺幽州至是近三十年矣通鑑原本云會過幽州刺
史王雄之孫戎問計將安出分註脫雄之孫三字似
是時王戎真為幽州刺史矣此必後來傳寫脫漏初
藁不應如是

鍾會反

聽內一親兵出取飲食下有諸牙門隨例各內一人烈
給語親兵及疏與子淵曰丘建密說消息會已作云云
諸牙門親兵亦咸說此語一夜轉相告皆徧明日日中

胡淵率其父兵雷鼓出門諸軍不期皆鼓譟而出爭先
赴城時會方給姜維鎧杖白外有兵向城會驚謂維曰
當云何維曰但當擊之耳會遣兵悉殺所閉諸牙門郡
守內人共舉機以柱門兵斫門不能入斯須城外倚梯
登城蟻附亂進牙門郡守各緣屋出

此條叙事瑣屑若復減少字句則不成節奏矣今據
原本補之

姜維率會左右戰衆格斬維爭前殺會又殺漢太子璿

華覈疏

驅怨民而赴白刃上有當委版築而應烽燧句

刪上句於大致無碍但進此疏本為作昭明宮故云
委版築有上句則文體方而本意更顯露耳

晉納賈氏

荀勗謂馮紆曰賈公遠出吾等失執太子昏尚未定何
不勸帝納賈公之女乎紆亦然之晉主初欲云云

此數句分註不錄竊謂荀馮自為故留賈克欲留克

故勸納克女鄙夫患失無所不至當存之以見亂晉之繇

西陵之戰

祜欲因水運糧原本作欲因所遏水以船運糧 楊肇至西陵陸抗令公安督孫遵循南岸拒羊祜水軍督留慮拒徐胤抗自將大軍憑圍對肇

晉兵三道入吳故抗亦三道禦之西陵步闡所據畔入巢窟故抗自將大軍當之分註刪去拒羊祜拒徐

脩獨詳西陵一軍殊覺疎漏

吳殺韋昭

以為歡下有昭以為外相毀傷內長尤恨使羣臣不睦
不為佳事故但難問經義而已吳主以為不奉詔命前
後積怒云云

陸抗疏

今臣所統千里外禦強對內懷百蠻而上下見兵財有
數萬

統轄闊遠外患強衆而見兵單寡不足備禦故奏請
增兵刪中兩句非是

特詔簡閱下有一切料出四字乃接以補云云

杜預

表曰自閏月以來賊但嚴勅而下無兵上以理執推之
賊之窮計力不云云 又表曰直是計不出已功不在
身各恥其前言之失而固守之也自頃朝廷事無大小
異意鋒起雖人心不同亦繇恃恩不慮云云

此一段寫出庸臣忌成功唱異論情態分註頗加刪削則亦由恃恩與功不在身氣脈不接

傅咸

咸上言設官太多舊都督有四今并監軍乃盈於十禹分九州今之刺史幾向一倍戶口比漢十分之一而置郡縣更多虛立軍府動有百數而無益宿衛五等諸侯坐置官屬諸所廩給皆出百姓此其所以困乏者也當今之急

此一段分註不載然設官之多必有實據分別說出
然後明悉時政之弊不然則籠罩想像而已

晉滅吳

張悌曰吳之將亡賢愚所知非今日也吾恐蜀兵至此
衆心駭懼不可復整及今渡江云云 乘勝南上逆之
中道不憂不破 三月悌等濟江圍渾部將張喬於楊
荷喬閉柵請降諸葛靚欲屠之悌曰強敵在前不宜先
事其小靚曰此屬以救兵未至力少不敵故且為降以

緩我非真伏也若捨之而前必為後患悌不從撫之而進與晉揚州刺史周浚結陳相對沈瑩等前戰不利引退衆亂晉兵乘之吳兵奔潰張喬自後擊之大敗吳兵於板橋

降張喬事分註不載以其不關吳兵勝負耶然非喬自後夾擊則雖敗而或不至於盡死惜乎覲謀之不用也

王濬上書

皓衆畔親離匹夫獨坐而江北諸軍不知虛實不蚤縛
取自為小誤臣至便得更見怨恚並云守賊百日而令
他人得之臣愚以為事君之道云云 復表乃無席可
坐上原本有皓宮之中四字

濬之自理雖失在不讓然形容當時情事最為可笑
故存之

齊王攸

猶催上道下有攸自強入辭素持容儀疾雖困尚自整

厲舉止如常帝益疑其無疾辭出數日嘔血而卒

晉武篡魏平吳統一四海史稱其明達好謀容納直言可不謂實錄乎至於兄弟父子之間又何其賢愚不辨處置失宜若彼也蓋驕泰日增聰明日蔽受詐信讒無所不至故耳分註刪入辭一段反不見晉武昏昧迷惑處

王渾父子

渾為尚書僕射渾子濟為侍中渾主者處事不當濟明

法繩之從兄佑因毀濟不能容其父帝由是疎濟後坐事免官

此事分註不載蓋深惡而痛絕之故不屑錄此耳愚謂此父子之不可為訓者即以此示訓可也

楊駿

乃令中書作詔以亮與駿同輔政云云駿從中書借詔觀之得便藏去中書監華廙恐懼自往索之終不與會帝復迷亂云云后召華廙及中書令何邵作詔以駿

為太尉云云詔成后對廩邵以呈帝帝視而無言遂趣
汝南王亮赴鎮

楊駿藏去詔書事分註刪之不知何意愚謂帝令中
書作詔同用汝南王亮則駿便藏去后詔廩邵作詔
獨用楊駿即矯帝命行之端恣如此此即楊氏滅族
之道

巴氏

初張魯在漢中賓人李氏自巴西宕渠往依之曹操克

漢中李氏將五百餘家歸之拜為將軍遷於畧陽北土
號曰巴氏其孫特庠流皆有材武云云

上數句分註不錄無以考氏首所自始今補之

廢太子

劉卞以賈后之謀問張華華曰不聞卞曰士感知已是
以盡言而公更有疑於卞耶華曰假令有此君欲如何
賊后謀害太子朝野咸知張華豈有不知者卞以正
問華以詭對更詰君欲如何其意若有恨於卞之間

者知其謀而不以告人懷詐匿情正於前番問答可見不宜刪

卞曰東宮俊乂云云 若得公命上有公居阿衡之任句

下文吾又不受阿衡之命張華正為此句設詞推委亦不宜刪

潘岳作書草下有令小婢承福以紙筆及草因太子醉稱詔使書之云云遂廢太子為庶人與妃王氏及三子

皆幽金墉城王衍自表離婚許之妃慟哭而歸 明年
幽於許昌太子至許遺王妃書自陳誣枉妃父衍不敢
以聞

衍身為大臣聯姻帝室視太子直如秦越自表離婚
明太子之當廢陳誣枉而不敢白聽太子之幽死忍
心害理一至於是雖禁錮終身未蔽厥辜

謀廢賈后

原本右衛督司馬雅下有常從督許超句 右將軍趙

王倫上有以張華裴頠安常保位難與行權二句 今
國無嫡嗣上有中宮凶妬無道誣廢太子二句

淮南王允討趙王倫

實奪其兵權下有允稱疾不拜秀遣御史劾以拒詔大
逆不敬允視詔乃秀手書也大怒將收御史斬之御史
走免斬其令史厲色謂左右曰趙王欲破我家遂帥國
兵云云

允之討倫其發怒在孫秀手書偽詔一節分註刪之

似端為失兵柄而然則是所爭者私忿非繇公義而
綱目亦不得以討書矣今據原本補之

主簿趙模諫陳摠

模曰今州郡不協必生大變當速行赴之府是兵要助
順討逆云云

州逆而郡順校尉府當助郡討州分註刪州郡云云
則為順為逆不知何所指

衆遂自潰下有摠逃草中模著摠服格戰廬兵殺模見

其非是更搜得摠殺之

摠不能用模而模終為摠死是亦義士不可沒其善

綱紀

原本云郡綱紀並為孝廉縣綱紀並為孝吏分註混作
郡縣綱紀並為孝廉廉吏

盧志

志說穎曰齊王衆號百萬與張泓等相持不能決大王
逕前濟河功無與貳今齊王欲與大王共輔朝政志聞

兩雄不俱立云云

提齊王並說乃見成都王功高於齊而能以輔政之
權獨歸齊王所謂兩雄不俱立者如此刪齊王云云
非是

任叡

益州兵曹從事任叡言於羅尚曰云云尚使叡夜縋出
城宣旨於諸塢期以二月十日同擊特叡因詣特詐降
特問城中虛實對曰糧儲將盡但餘貨帛耳叡求出省

家特許之遂還報尚二月尚遣兵掩襲特營云云

獻之言於尚者蓋謂計畫當如是耳未及行事也夜
縋出城以下方見任獻期約諸塢諜探李特幹用分
註刪去實事僅錄空言令讀者泛泛

新野王歌

馬尾作髯下有歌上言妖賊犬羊萬計絳頭毛面挑刀
走戟其鋒不可當請臺敕諸軍救助詔劉喬屯汝南劉
弘等屯宛賊兵向豫州劉喬擊却之歌將出兵王綏止

之張昌至樊城云云

賊未至樊朝廷謀所以禦之者進退不一皆諸王為政故也雖不可盡錄亦不可盡刪今姑舉其要者補之

劉弘

羅尚遣別駕李興詣弘求糧弘綱紀以運道阻遠且荊州自空乏欲以零陵米五千斛與尚弘曰天下一家彼此無異吾今給之則無西顧之憂矣遂以三萬斛云云

觀弘所云可謂有宏濟之度矣分註但載絡米而不詳此語畧其語何由得其心哉

劉弘表

自頃兵戈紛亂猜廝鋒生疑隙構於羣王災難延於宗子今日為忠明日為逆翩其反而互為戎首云云臣竊悲之今邊陲無豫備之儲中華有杼軸之困而股肱之臣不惟國體職競尋常自相楚剝萬一四裔云云

此表當時確論而分註所載斷續不可讀故據原本

補之

顧榮說陳敏

榮說敏曰中國喪亂淵勒內侮勢不能復振百姓將無遺種江南雖經石冰之亂人物尚全榮常憂無孫劉之主有以存之今將軍神武不世云云

敏疑諸名士榮為之解救必先以虛名欣動之而後勸以信用君子孫劉以上等語所謂似迂而實切者不必刪

劉弘任陶侃

侃聞之遣子洪及兄子臻詣弘以自固 弘為叅軍資而遣之曰賢叔征行君祖母年高便可歸也匹夫之交尚不負心況大丈夫乎

觀下文賢叔之稱則兄子臻句必不可刪刪此句不得不并刪賢叔征行等語矣愚謂信侃之不負心此肝膽之言也資遣臻等歸侍祖母此性情之事也觀分註之去留如彼豈以肝膽重於性情哉

華譚書

命危朝露下有諸君或剖符名郡或列為近臣而更辱
身姦人之朝降節叛逆之黨不亦羞乎今皇興東返

顧榮周玘所謂枉尺而直尋者然譚之書亦不為無
助諸君以下數語慷慨激切令讀者悚然存之可也

周馥

太傅越召周馥及淮南太守裴碩馥不肯行令碩率兵
先進碩詐稱受越密旨襲馥為馥所敗退保東城求救

於琅邪王睿睿使甘卓攻馥於壽春馥衆潰奔項憂憤而卒揚州刺史劉陶卒琅邪王睿復以王敦為揚州刺史尋加都督

原本所載馥事如右分註云馥不行睿遂攻之不詳前此曲折則兵端自睿始矣王敦先刺揚州避錢璜奔建業會劉陶卒睿復以敦為之分註云馥敗走死睿以敦為揚州似逐馥而用敦非其實矣蓋不辨周裴之枉直而輕用兵以攻馥劉陶死不請命於朝而

私用敦是則睿有罪焉分別書之可也聯書則情事有間而睿之罪更有大焉者耳

秦王業入雍城

雍州刺史麴特下有新平太守竺恢皆不降於漢聞足起兵與扶風太守梁綜帥衆十萬會之

不錄竺恢梁綜則帥衆十萬似麴特一人之事矣且秦王入雍以後使梁綜將兵衛之則上文亦當有張本

救晉陽

猗盧曰吾不蚤來致卿父母見害誠以相媿今卿已復州境吾遠來士馬云云

猗盧鮮卑也重信義急患難如此勝王浚遠矣

陶侃破杜弢

弢退保泠口下有侃曰弢必步向武昌乃自徑道還郡以待之弢果來攻侃使朱伺逆擊大破之弢遁歸長沙周顗出潯水投王敦於豫章敦留之

歿退保泠口將以誤侃也侃知之故從徑道還郡而使朱伺逆擊破之分註刪歿必步向武昌以下而以侃使朱伺句徑接保泠口不惟不見陶公料敵之明又似逆擊杜歿於泠口矣

李雄

巴郡嘗告急云有晉兵雄曰吾嘗憂琅邪微弱遂為石勒所滅以為耿耿不圖乃能舉兵使人欣然

此段分註不錄疑其不情也然此等言語非一時所

能假託又若素有心者蓋憫晉朝惡石勒人之恒情
遐邇無間故也

劉琨上表

東北八州勒滅其七先朝所授存者惟臣勒據襄國與
臣隔山朝發夕至城塢駭懼雖懷忠憤力不從願耳
此表分註不錄亦可見石氏日益强大而琨之孤危
日甚矣卒之殺琨者非石勒也雖懷忠憤而智不存
身惜哉

陷北地

使反間給允上有曜繞城縱火烟起蔽天

有二句方可以城陷給允不宜刪

劉琨救樂平

恐其難用下有不若內收鮮卑之餘穀外抄石賊之牛
羊句 務農息兵下有待其服化感義然後用之則功
無不濟矣琨不從

然後用之正與恐其難用應不宜刪

張實遺相國保書

敕驀還軍下有俄聞寇逼長安胡崧不進麴允持金五百請救於崧遂決遣驀等進軍度嶺會聞朝廷云云

胡崧保所遣雖破劉曜而屯兵不進實有誤國之罪責崧所以責保也刪之非是

璞等卒不能進而還至南安諸羌斷路相持百餘日糧竭矢盡璞殺車中牛以享士泣謂之曰汝曹念父母乎曰念念妻子乎曰念念欲生還乎曰欲從我令乎曰諾乃

鼓譟進戰會張閬帥金城兵繼至夾擊大破之

璞等雖還然非大破諸羌亦不得歸其艱阻如彼分
註刪之似璞等從容無事而還矣

朱伺

外示屈服下有欲誘官軍使西然後兼道襲楊口耳宜
大部分云云

賊計果如是刪之無以別智士

張詵

誅言子實曰南陽王國之疏屬忘其大恥而亟欲自尊云云

分註訛為南陽失大體

鄭騫說甘卓

於義安乎下有且議者之所難以彼強而我弱也今大將軍之兵不過萬餘其留者不能五千而將軍見衆既倍之矣以將軍之威名云云以順討逆下有豈王含所能禦哉邈流之衆勢不自救將軍之舉武昌云云

騫之說卓是非利害俱見分註刪上兩節語意未足故稍補之

譙王承書

江左中興草創始爾豈圖惡逆萌自寵臣吾以宗室受任志在隕命而至止尚淺凡百茫然足下能卷甲云云書不數語而時事始末了然蓋忠誠之所發也以此復甘卓惜乎所語非其人耳卷甲以上分註不備似少源委

王彬

何哀而哭之下有彬曰伯仁長者在朝雖無蹇諤亦非阿黨而加之極刑所以傷惋也因勃然數敦云云

先辨伯仁之當哭然後數敦罪則詞理有序分註刪伯仁長者以下數語直接彬勃然數之便覺文勢齟齬

彬殊無懼容下有竟不肯拜四字

此句當存之見得王導勸彬起謝如此結煞

謝鯤

物情皆悅服矣下有敦曰君能保無變乎對曰鯤近日入覲主上側席遲得見公宮省穆然必無虞也公若入朝鯤請侍從敦勃然曰正復殺君等數百人亦復何損於時竟不朝而去

鯤在敦所言語應對乖忤逆敦者數矣最後勸敦入朝此又他人之所不敢言者敦雖不從而幼與眷戀本朝之心可見矣昏酣放達之流而能不昧大義如

此此所以詳錄其事也

周崎易雄

魏又等攻湘州急譙王遣從事周崎間出求救為邏者
所得又使崎語域中稱大將軍已克建康甘卓還襄陽
外援理絕崎偽許之既至城下大呼曰援兵尋至努力
堅守又殺之初春陵令易雄移檄遠近列敦罪惡及
長沙陷雄為人所執檻送武昌雄見王敦意氣慷慨敦
遣人以檄示雄而數之雄曰此實有之惜吾位微力弱

不能救國難耳今日之死固所願也敦潛殺之

二人皆義士皆當附見於譙王之後分註刪之不識
何意

故吳內史張茂妻陸氏

陸氏傾家產帥茂部曲為先登以討沈充報其夫讐充
敗陸氏詣闕上書為茂謝不克之責詔贈茂太僕

率兵報讐義烈固凜凜矣至其上書之指不曰告哀
而曰謝責立言命意又有出於常情之外者故補書

於周易之後

卞壹與溫嶠書

元規召峻意定此國之大事峻已出狂意而召之是更速其禍也必縱毒螫以向朝廷吾與之爭甚懇切而不能如之何本出足下以為外援今更恨足下在外不得共諫止之也嶠亦屢書止亮

此書分註不載然詳味意旨亦見當時內而朝廷外而征鎮所倚重者惟卞與溫溫既居外卞失其助故

庾亮得恣行胸臆耳卒之壺著忠貞之節嶠成滅賊之勲微二公者司馬氏豈復能國哉

討蘇峻

毛寶說嶠曰凡舉大事當與天下共之師克在和云云當外示不覺下有況自為攜貳耶句 陶侃表王舒監浙東軍事虞潭監浙西軍事

分註云侃表舒潭監浙東西軍事蓋為省字計故每每為是籠統之言

祖渙桓撫襲湓口下有陶侃將自擊之毛寶曰義軍恃
公公不可動寶請討之渙撫過皖因攻譙國內史桓宣
寶往救之為渙撫所敗箭貫寶髀徹鞍云云還擊渙撫
破走之宣乃得出歸於溫嶠

此節如分註所刪事會朦朧無首無尾

九月戊申王導攜二子與降將路永俱奔白石 郝鑒
責叅軍曹納曰吾受先帝顧託之重正復捐軀九泉不
足補塞今強寇在近衆心危懼君腹心之佐而生長異

端當何以帥先義衆鎮壹三軍耶將斬之云云

鑒自廣陵渡江會溫陶於茄子浦既而還守京口觀其責納之言可以知其心矣此鑒之功所以與溫陶並也彼王導者遺詔首輔乃棄幼主奔白石欲求苟免何哉

庾亮自陳

祖約蘇峻縱肆凶逆罪由臣發寸斬屠戮不足以謝七廟之靈塞四海之責朝廷復何理齒臣於人次臣亦何

顏自次於人理云云

亮之罪溫公斷之審矣晉雖無政而亮之良心必不容昧分註削此疏惡其飾偽詞以欺衆也今特存之者明亮之自陳是即當時公案云爾

陶侃討郭默

默遣使送妓妾及絹并寫中詔呈侃叅佐多諫曰默不被詔豈敢為此若欲進軍宜待詔報侃厲色曰國家年幼詔令不出胸懷劉脩為朝廷所禮雖方任非才何緣

猥加極刑郭默恃勇以大難新除禁網寬簡欲因際會
騁其縱橫耳發使上表言狀云云

陶公揣量郭默情事如睹分註刪默遣使以下一段
粗述陶公討賊大致不見其機神明鑑處

張淳責李雄

雄甚慚下有曰我祖考本亦晉臣遭天下大亂與六郡
之民避難此州為衆所推遂至今日琅邪若能中興大
晉亦當帥衆輔之厚為淳禮而遣之

李雄意傾險而辭恭順分註惡其意故刪其辭要之
中外之變雄固識之矣典午不競故五氏猖狂至此
使琅邪能中興大晉即劉石苻姚皆將厥角稽首矣
豈惟巴氏云爾哉

李洪

趙攻棘城燕有司馬李洪之弟普以棘城必敗勸洪出
避禍洪曰天道難知且當委任勿輕動取侮普固請不
已洪曰卿意見明審當自行之吾受慕氏大恩義無去

就當效死於此與普流涕而訣普遂降趙從趙軍南歸
死於喪亂洪由是以忠篤著名

洪欲守義普欲避禍孰知避禍者不能免禍守義者
反以全生人事所當然天心不須問補錄此條以為
知命者之勸

蔡謨疏

壽陽城小而固自此至琅邪城堡相望一城見攻衆城
必救又王師在路云云

梁犢反

既不在赦例又勅雍州刺史張茂送之茂皆奪其馬使之步推鹿車致糧戍所高力督梁犢因衆怨謀作亂東歸衆聞之皆踊抃大呼云云遂東出潼關進趣洛陽此石氏僞東宮宣之衛士也以宣故謫戍既不赦其罪又奪其馬是迫之使亂也分註刪又勅以下一段不見疾之已甚處

冉閔滅石氏

閔知舊人不為己用班令內外趙人斬一首送至鳳陽
門者文官進位三等武官悉拜牙門一日之中斬首數
萬閔親帥趙人云云

有劉淵劉聰則生靳準以滅劉氏有石勒石虎則生
冉閔以滅石氏然石虎滅劉曜所阬五郡匈奴不過
五千餘人而冉閔之所殺至二十餘萬何其衆也斯
時也出爾反爾之報為造化者初非有心於其間所
謂天道好還也

賈堅

堅為燕所禽慕容怯聞其善射置牛於百步上以試之
堅曰少之時能令不中今老矣往往中之乃射再發一
矢拂脊一矢磨腹皆附膚落毛上下如一觀者咸服其
妙

善射事分註不載畧之也然果如所言是亦當時絕
藝故備記之

常煒

張舉言在襄國下有煒曰滅石氏日在鄴者殆無子遺
時有迸漏者皆潛伏溝壑彼安知璽之所在乎求救者
云云 私誘之下有煒正色曰石氏貪暴親率大兵攻
燕國都雖不克而返然志在必取魏主誅剪石氏雖不
為燕臣子之心聞仇讐之滅義當如何而更為彼責我
不亦異乎左右請殺之云云

冉閔石氏之亂臣然猶知尊晉其志足尚也為之使
若煒者亦可謂能專對矣分註所刪兩節皆目前實

事足以折服燕人者仍舊為安

高崧

崧言于昱曰王宜致書諭以禍福自當返旆如其不爾便六軍整駕逆順於茲判矣乃於坐為昱草書云云

彪之為殷浩謀崧為相王謀兩人之意頗同而崧說尤為嚴重分註但載為昱草書而刪言于昱數語不見正義所在

賈堅

美兵四集下有堅立馬橋上左右射之皆應弦而倒美
兵衆多從塹下斫橋堅人馬俱陷生擒之

堅以善射名而卒死於射觀其荅荀美之語幾於進
退維谷矣改節雖不忠背本亦不義彼食鮮卑之祿
而不能為鮮卑死其人固可鄙食鮮卑之祿而僅僅
為鮮卑死則其身又可惜夫不嚴中外之分而輕定
君臣之分此古來功名之士所以不能免於春秋之
責也故再錄賈堅以深致憫惜之意

慕容雋夢石虎

燕主雋夢趙王虎齧其臂乃發虎墓求尸不獲購以百金鄴女子李莧知而告之得尸於東明觀下僵而不腐雋踟而罵之數其殘暴之罪而鞭之投於漳水尸倚橋柱不流

石虎得良死亦天道之未盡者死十餘年矣假鮮卑之夢發餒鬼之尸豈非一時快事猶恨燕雋不令斮而焚之僅乃鞭而投之水也此事綱目不錄今為補

書聊以少舒讀者之公憤耳

梁琛

所不敢也下有乃不果館奕數來就邸舍與琛卧起間
問琛東國事琛曰今二方分據兄弟並蒙榮寵論其本
心各有所在云云

分註刪乃不果館句則似琛館於奕舍矣又刪奕數
來就邸舍與琛卧起又改間問為數問此等處俱不
近情

秦留梁琛月餘乃遣歸琛兼程而進比至鄴吳王垂已奔秦琛言於太傅評曰云云評曰秦豈肯受叛臣而敗和好哉琛曰二國分據中原常有相吞之志桓溫之入寇彼以計相救非愛燕也若燕有釁彼豈忘其本志哉評之料秦信其不肯受叛臣而敗和好姑且苟安無事其為燕暉謀亦主此意此即亡國之本分註刪此段問答而以秦主何如人徑接宜為之備之下無論氣脈不貫反似刪其緊要者而存其泛緩者

梁琛

莫如孝下原本云自非有一至之心者莫能保忠孝之始終是以古之烈士云云

臣莫如忠子莫如孝大概公共語耳下兩句則梁琛獨到語且深於見理者似不宜刪

王猛與張天錫書

惟審於強弱也下有今論涼土之力則損於往時語大秦之德則非二趙之匹而將軍翻然自絕無乃非宗廟

之福也歟以秦之威云云劉表謂漢南可保將軍謂西河可全吉凶在身元龜不遠宜深算妙慮自求多福無使六世之業一旦而墜地也

分註刪節此書殊無情緒蓋刪其前則有率遽之嫌刪其後則少寫送之致故因原本補之惟去回弱水兩句以頗近粗俗也

符堅報王猛書

既以六州相委則朕無東顧之憂非所以為優崇乃朕

自求安逸也夫取之不易守之尤難苟任非其人患生
慮表故虛位台鼎而以分陝為先卿未照朕心殊乖素
望新政俟才宜速銓補俟東方化洽當衮衣西歸

此書分註不載愚謂堅之於猛不惟信之篤任之端
乃其發於辭令者亦復真切洞達藹然可觀因為補
錄明其非虛文比也

孝武即位

帝崩下有羣臣疑惑未敢立嗣八字乃接或曰當須大

司馬云云

未敢奉令下有謹具封還四字

皇太后攝政

王彪之曰前世人主幼在襁褓母子一體故可臨朝今上年出十歲垂及冠婚反令從嫂臨朝示人主幼弱豈所以光揚聖德乎

如彼則可臨朝如此則不當臨朝兩意開說最易曉人刪上數句反不見借容形主之法

田泓

南軍垂至下有我單行來報為賊所得二句

符堅南寇

勸之下有陽平公融諫曰鮮卑西羌我之仇讐常思風塵之變以逞其志良家少年不閑軍旅苟為諂諛之言以會陛下之意今陛下信而用之輕舉大事臣恐功既不成仍有後患悔無及也堅不聽

良家子惟予莫違或無他意垂與畏舟中敵國乃信

其詭辭而不能燭其慘志非天奪其魄不至此融之言分註不盡錄

慕容楷服東夷

今大業始爾上有遼東烏桓及冀州之民本皆燕臣三句

以燕主招燕民故易為力此三句不宜刪

吾當止一處為軍聲之本汝巡撫民彝示以大義彼必當聽從楷乃屯於辟陽云云

大兵屯駐示之以威靈分兵巡撫綏之以恩信招攜服畔之用政在此兩句亦不宜刪

符堅諭秦民

為西燕所殺下有堅謂之曰聞來者多不善達此誠忠臣之義然今寇難殷繁非一人之力所能濟也徒相隨入虎口何益汝曹宜為國自愛畜糧厲兵以俟天時三輔之民云云

堡壁之民僅存者幾何猶必以兵糧助堅相隨殄滅

諭之不止而他處又復然堅亦庶幾得民矣錄此益
不沒其善猶勝於國亡君死而民不見思者

參合陂

乙酉暮魏軍至陂西燕軍在陂東營於蟠羊山南水上
云云丙戌日出魏軍登山下臨燕營燕軍將東引顧見
之士卒大驚云云

慕容會

寶愛少子策意不在會長樂公盛與會同年恥為之下

乃與趙王麟共勸寶立策寶從之立策為皇太子會聞之愠懟

寶之意既以愛移非徒無諫止之者而盛與麟方且勸成之此燕之所以終於亂也盛麟云云分註不錄拓跋珪降信都

王建等攻信都六十餘日不下士卒多死庚申拓跋珪自攻信都壬戌夜燕宜都王鳳踰城奔中山癸亥信都降魏

建攻信都久而不下攻之緩也珪自攻之四日而降
攻之急也則珪之虐用其衆亦可見矣此條無分註
據原本補之

燕去中山保龍城

高撫善卜筮素為隆所信厚私謂隆曰殿下北行終不
能達太妃亦不可得見若使主上獨往殿下潛留於此
必有大功隆曰國有大難主上蒙塵且老母在北吾得
北首而死猶無所恨卿是何言也 農部將谷會歸說

農曰城中之人皆涉圭參合所殺者父兄子弟泣血踴躍欲與魏戰而為衛軍所抑今聞主上當北遷皆曰得慕容氏一人奉而立之以與魏戰死無所恨大王幸留此以副其望擊退魏師撫寧畿甸奉迎大駕亦不失為忠臣也農曰必如此以望生不如就死

劉身之曰農隆皆稱有志畧而所見類如此天之廢燕智者失其智矣此兩節分註不載今補之以上尚有將士數千自請于寶願得一戰及慕容隆謂諸

參佐等語皆慷慨激切疊疊動人但不及悉補錄耳

段速骨攻陷龍城

蘭汗陰與段速骨通謀引兵營龍城東遼西王農恐不能守且為蘭汗所誘夜潛出赴之冀以自全明日速骨等攻城城上拒戰甚力速骨之衆死者以百數速骨乃將農巡城農素有云云速骨幽農於殿內其謀主阿交羅以高陽王崇幼弱欲更立農崇黨聞之殺羅及農農不能死守而輕出求全龍城之陷農實有罪焉但

其出其死尚多委曲如分註所刪更嫌直致

蘭汗弑燕寶

寶至索莫汗陁去龍城四十里汗乃遣弟加難帥五百騎出迎見寶于陁北拜謁已從寶俱進餘崇密言於寶曰觀加難形色禍變甚逼宜留三思奈何徑前寶不從行數里加難先執餘崇殺之引寶入龍城外邸弑之

殺餘崇事分註不載然餘崇不死寶不可得而弑也故加難先殺崇而後及寶崇亦可謂能為有無者矣

慕容德據青兗

竺朗善占候德使問之朗曰今歲之初彗星起奎婁掃虛危奎婁為魯虛危為齊宜先取兗州巡撫琅邪至秋乃北狗齊地此天道也德乃引師而南

此段分註不載若曰朗焉知天道云爾然天事恒象占事知來馮相保章之責固不可盡廢也

劉牢之叛

牢之素惡元顯恐桓玄既滅元顯益驕恣又恐已功名

愈盛不為元顯所容且自恃云云

牢之隱情如此記事者極意洗發全錄乃見巔末

其子敬宣諫曰玄藉父叔之資據有全楚割晉國三分之二一朝縱之使陵朝廷玄威望既成恐難圖也牢之怒曰吾豈不知云云

敬宣陳利害最為明白牢之怒不從亦可見其悍而愚矣分註但云又諫而語不載豈以其終於請降而畧之耶

郭麐

初麐善天文術數常言代呂者王故其起兵先推王詳後推王乞基及呂隆東遷王尚卒代之麐從乾歸降秦以為滅秦者晉也遂來奔秦人追得殺之

麐長於術數如騾馬生白額駒之類亦有能動人者然麐知代呂者王滅秦者晉而不知殺已者秦小慧私智窺測易窮故也此節分註不載然著之足以為不見眉睫之戒

劉裕劉毅何無忌等起兵京口

孟昶妻周氏富於財昶謂之曰劉邁毀我使我淪陷我
決當作賊卿幸早離絕脫得富貴相迎不晚也周氏曰
君父母在堂欲建非常之謀豈婦人所能諫事之不成
當於奚官中奉養大家義無歸志也昶愴然久之起周
氏追昶坐曰觀君舉措非謀及婦人者不過欲得財物
耳遂傾資以給之何無忌夜於屏風裡草檄文其母
劉牢之姊也登橙密窺之云云問所與同謀者曰劉裕

母尤喜因為言玄必敗舉事必成之理以勸之

周與劉皆有丈夫識畧非尋常女流也當是時正名討罪雖婦人亦知勇於赴義而不復顧私家人情如此固知賊不足平也分註不載周氏劉氏亦不詳錄今補之

斬桓修以徇下有修司馬刁弘帥文武佐吏來赴裕登城謂之曰郭江州已奉乘輿返正於尋陽我等並被密詔誅除逆黨今日賊玄之首已當梟於大航矣諸君非

大晉之臣乎今來欲何為弘等信之收衆而退

桓修兩州刺史徐兗重鎮裕等誅之太易刁弘之舉
勢所必有但裕之所以折服刁弘似前定之言非倉
卒取辦者補錄此節明舉大事者必成以多算也

覆舟山之戰

悉棄餘糧下有進至覆舟山東使羸弱登山張旗幟為
疑兵數道並前布滿山谷謙等士卒多北府人素畏服
裕莫有鬪志裕與劉毅分為數隊云云

裕等所將兵少故為疑兵以誤之又北府人素畏裕名故無鬪志此皆義兵取勝之由似不可刪

桓玄挾帝入江陵

玄至江陵荆江諸郡聞元播越有上表奔問起居者玄皆不受更令所在賀遷新都

諸郡不知討賊已昧大義況當玄出走之後猶且表問起居桓玄奔竄苟免與死為鄰不知愧懼猶令所在以遷都稱賀此等世界尚知羞惡尚有人心否乎

錄之可發一粲

桑落洲之戰

欲詐我耳下有宜急攻之衆曰澹之不在其中得之無益無忌曰今衆寡不敵戰無全勝澹之既不居此舫戰士必弱云云

崢嶸洲之戰

豈能自固下有玄雖竊名雄豪內實恒怯加之已經奔敗衆無固心決機兩陳云云

卷二
玄雖以下數語可謂審於料敵不宜刪

桓振復襲江陵

振自鄖城復襲江陵司馬休之戰敗走振自稱荊州刺史建威將軍劉懷肅引兵馳赴與振戰於沙橋劉毅遣唐興助之臨陣斬振復取江陵

此條無分註事既不詳大書將軍劉懷肅與戰誅之下亦不書復江陵意亦未備

慕容超

竊以公孫氏及段氏逃於羌中 十歲而公孫氏病臨
卒以金刀授超曰女得東歸當以此刀還女叔也 呂
隆降秦超隨涼州民徙長安 備德聞納有遺腹子在
秦遣吳辨往視之辨因鄉人宗正謙以告超 超潛與
謙變姓名逃歸南燕

分註語意參差公孫氏下刪病臨二字降秦下刪超
隨涼州民五字尤於事理有碍今據原本頗為加詳
毛修之

表言人之所以重生實有生理可保臣之情地生途已竭所以偕命朝露者庶憑天威誅夷讐逆今每有可乘之機而鮑陋每違期不赴臣雖効死寇庭而救援理絕將何以濟劉裕乃表劉敬宣帥師伐蜀

毛氏自寶以來代著忠節今舉家橫離酷禍而朝廷不能為之救卹故修之之表痛切如彼分註不載今補之憫死忠也

劉穆之

今朝議如此宜相酬答必云在我措辭又難唯應云神州治本宰輔崇要此事既大云云

穆之為裕謀措辭用意殊費揣摩朝議云云正其躊躇滿志處也刪之非是且又刪神州二句則此事既大句亦虛接不上

沈林子

吾衆寡不敵上有云賊聲往白石而數來挑戰其情可知三句

桓謙苟林寇荊州

自帥諸軍攻謙下有諸將佐皆曰今遠出討謙其勝難必苟林近在江津伺人動靜若來攻城宗之未必能固脫有蹉跌大事去矣道規曰苟林愚懦以吾去未遠必不敢向城吾今取謙往至便克沈疑之間已自還返謙敗則林破膽豈暇得來且宗之獨守何為不支數日乃馳往攻謙云云還至涌口討林林走遣劉遵追斬之諸將佐之言亦似有籌算者但得其一不得其二惟

道規能知桓謙之易取又知荀林之不敢輕向城又知宗之之可以居守所謂知己知彼者分註記其成功而刪其謀議非是

大雷之戰

裕悉出輕艦分註作輕騎帥衆軍齊力擊之分註作及水軍擊之原本投火下有焚之二字分註無

賊衆塞江而下舳艫無際裕乃悉出輕艦以禦之此水戰也所帥衆軍皆水軍也分註訛一騎字故云及

水軍似水陸兼用矣下文不云分步騎屯於西岸乎
投火焚之焚賊泊西岸之艦也刪焚之二字泛云投
火不知投火何為

劉裕襲荊州

輒割豫江文武兵力原本分豫州文武江州兵力 鎮
惡徑前襲賊語前軍士有問者但云劉兗州至津戍及
民間皆晏然不疑未至城五六里逢毅要將朱顯之欲
出江津問劉兗州何在軍士曰在後顯之至軍後不見

藩而見軍人擔彭排戰具望江津船艦已被燒鼓嚴之
聲甚盛知非藩上便躍馬馳去告毅行令閉諸城門鎮
惡亦馳進門未及下關軍人因得入城

上一段言捨舟登岸事此一段言前往襲城事分註
前詳後畧不識何意 王鎮惡行詐用譎助成劉裕
之殘忍史氏備著其謀蹤跡詭異令人應接不及謀
愈密而惡愈彰矣

伐蜀

毛修之固請行裕恐修之至蜀必多所誅殺土人與毛氏有嫌亦當以死自固不許


不因修之之恨怒使之伐蜀此劉裕之深計非他人所及刪此則無以發付修之

捨船步進下有蜀將譙撫之屯牛脾譙小苟塞打鼻臧熙擊斬撫之小苟聞之亦潰諸營屯望風相次云云

擊斬撫之小苟驚潰然後諸營奔潰分註刪此兩事徑以望風相次奔潰接在捨船步進之下殊覺情事

率易

縱乃縊而死巴西人斬首送齡石 譙道福盡散金帛
以求戰衆受之而走道福逃於獠中巴民執送斬之
道福蜀將之桀黠者且握重兵道福不誅則蜀不可
得平也刪其事亦非是



綱目分註拾遺卷二